

四庫全書

集部

欽定四庫全書

集部

三國志文類卷

五十六至
六十

詳校官中書臣瞿照

助教臣常循覆勘

總校官原任中允臣王燕緒

校對官中書臣范奎

謄錄監生臣戴朝琮

欽定四庫全書

三國志文類卷五十六

祭文

魏

文帝受禪祭天地獄瀆文

皇帝臣丕敢用玄牡昭告于皇皇后帝漢歷世二十有四踐年四百二十有六四海困窮三綱不立五緯錯行靈祥並見推術數者慮之古道咸以為天之歷數運終

茲世凡諸嘉祥民神之意比昭有漢數終之極魏家受命之符漢主以神器宜授於臣憲章有虞致位于丕丕震畏天命雖休勿休羣公庶尹六事之人外及將士洎于蠻夷君長僉曰天命不可以辭拒神器不可以久曠羣臣不可以無主萬機不可以無統丕祇承皇象敢不欽承卜之守龜兆有大橫筮之三易兆有革兆謹擇元日與羣寮登壇受帝璽綬告類于爾大神唯爾有神尚饗永吉兆民之望祚于有魏世享

明帝追冊漢帝告祠文帝廟文

明帝即位詔有司追謚山陽公

為漢孝獻皇帝使太尉具以一太牢告祠文帝廟曰

叡聞夫禮也者反本脩古不忘厥初是以先代之君尊尊親親咸有尚焉今山陽公寢疾棄國有司建言喪紀之禮視諸侯王叡惟山陽公昔知天命永終於已深觀歷數允在聖躬傳祚禪位尊我民主斯乃陶唐懿德之事也皇初受終命公于國行漢正朔郊天祀祖禮樂制度率乃漢舊斯亦舜禹明堂之義也上考遂初皇極攸

建允熙克讓莫朗于茲蓋子以繼志嗣訓為孝臣以配
命欽述為忠故詩稱匪棘其猶聿追來孝書曰前人受
命茲不忘大功勳敢不奉承徽典以昭皇考之神靈今
追謚山陽公曰孝獻皇帝冊贈璽紱命司徒司空持節
弔祭護喪光祿大鴻臚為副將作大匠復土將軍營成
陵墓及置百官羣吏車旗服章喪葬禮儀一如漢氏故
事喪葬所供羣官之費皆仰大司農立其後嗣為山陽
公以通三統永為魏賓於是贈冊曰嗚呼昔皇天降戾

于漢俾逆臣董卓播厥凶虐焚滅京都却遷大駕于時
六合雲擾姦雄燦起帝自西京徂唯求定臻茲洛邑疇
咨聖賢聿改乘輅又遷許昌武皇帝是依歲在玄枵皇師
肇征迄于鶉尾十有八載羣寇殲殄九域咸乂惟帝念
功祚茲魏國大啟土宇爰及文皇帝齊聖廣淵仁聲旁
流柔遠能邇殊俗尚義乾精承祚坤靈吐曜稽極玉衡
允膺歷數度于軌儀克厭帝心乃仰欽七政俯察五典
弗采四嶽之謀不俟師錫之舉幽贊神明承天禪位祚

建朕躬統承洪業蓋聞昔帝堯元愷既舉凶族未流登
舜百揆然後百揆時序內平外成授位明堂退終天祿
故能冠德百王表功嵩嶽自往迄今彌歷七代歲暨三
千而大運來復庸命底績纂我民主作建皇極念重光
紹咸池繼韶夏超羣后之遐蹤邈商周之慙德可謂高
朗令終昭明洪烈之懿盛者矣非夫漢魏與天地合德
與四時合信動和民神格于上下其孰能至於此乎朕
惟孝獻享年不永欽若顧命考之典謨恭述皇考先靈

遺意闡崇弘謚奉成聖美以章希世同符之隆以傳億載不朽之榮竊而有靈嘉茲宏休嗚呼哀哉

張昭等作陶謙哀辭

謙死時年六十三張昭等為之作哀辭曰

猗歟使君君侯將軍膺秉懿德允武允文體足剛直守以溫仁令舒及盧遺愛于民牧幽暨徐甘棠是均憬憬夷貊賴侯以清蠹蠹妖寇匪侯不寧惟帝念績爵命以章既牧且侯啟土漂陽遂升上將受號安東將平世難社稷是崇降年不永奄忽殂薨喪覆失恃民知困窮曾

不旬日五郡潰崩哀我人斯將誰仰憑追思靡及仰叫
皇穹嗚呼哀哉

三國志文類卷五十六

欽定四庫全書

三國志文類卷五十七

誄

魏

曹植作文帝誄

嗚呼哀哉于時天震地駭崩山隕霜陽精薄景五緯錯
行百姓吁嗟萬國悲悼若喪考妣恩過慕唐擗踊郊野
仰想穹蒼歟曰何辜早世隕喪嗚呼哀哉悲夫大行忽

馬光滅永棄萬國雲往雨絕承問荒忽惛懵哽咽袖鋒
抽刃欲自僵斃追慕三良甘心同穴感恨南風惟以鬱
滯終於偕沒指景自誓考諸先記尋之哲言生若浮寄
惟德可論朝聞夕逝孔志所存皇雖一没天祿永延何
以述德表之素旃何以詠功宣之管絃乃作誄曰皓皓
太素兩儀始分中和產物肇有人倫爰暨三皇實秉道
真降逮五帝繼以懿純三代製作踵武立勲季嗣不維
網漏于秦崩樂滅學儒坑禮焚二世而殲漢氏乃因弗

求古訓羸政是遵王綱帝典聞爾無聞朱光幽昧道究
運遷乾坤迴歷簡聖授賢乃眷大行屬以黎元龍飛啓
祚合契上元五行定紀改號革年明明赫赫受命于天
仁風偃物德以禮宣祥惟聖質疑在幼妍庶幾六典學
不過庭潛心無罔亢志青冥才秀藻朗如玉之瑩聽察
無響瞻覩未形其剛如金其貞如瓊如冰之潔如砥之
平爵功無私戮違無輕心鏡萬機攬照下情思良股肱
嘉昔伊呂搜揚側陋舉湯代禹拔才巖穴取士蓬戶唯

德是縈弗拘禰祖宅士之表道義是圖弗營厥險六合
是虞齊契共遵下以純民恢拓規矩克紹前人科條品
制褒貶以因乘殷之輅行夏之辰金根黃屋翠葆龍鱗
紉冕崇麗衡統惟新尊肅禮容矚之若神方牧妙舉欽
於恤民虎將荷節鎮彼四鄰朱旗所勦九壤被震疇克
不若孰敢不臣縣旌海表萬里無塵虜備凶徹鳥殪江
岷摧若涸魚乾腊矯鱗肅慎納貢越裳效珍條支絕域
侍子內賓德濟先皇功侔太古上靈降瑞黃初俶祐河

龍洛龜陵波游下平鈞應繩神鸞翔舞數莢階除系風
扇暑皓獸素禽飛走郊野神鐘寶鼎形自舊土雲英甘
露瀝塗被宇靈芝冒沼朱華蔭渚回回凱風祁祁甘雨
稼穡豐登我稷我黍家佩惠君戶蒙慈父圖致太和洽
德全義將登介山先皇作儷鐫石紀勲兼錄衆瑞方隆
封禪歸功天地賓禮百靈勲命視規望祭四嶽燎封奉
柴肅于南郊宗祀上帝三牲既供夏禘秋嘗元侯佐祭
獻璧奉璋鸞輿幽藹龍旌太常爰迄太廟鐘鼓鏗鏘頌

德詠功八佾鏘鏘皇祖既饗烈考來享神具醉止降茲
福祥天地震蕩大行康之三辰暗昧大行光之皇紘絕
維大行綱之神器莫統大行當之禮樂廢弛大行張之
仁義陸沈大行揚之潛龍隱鳳大行翔之䟽狄遐康大
行匡之在位七載元功仍舉將永太和絕迹三五宜作
物師長為神主壽終金石等算東父如何奄忽摧身后
土俾我熒熒靡瞻靡顧嗟嗟皇穹胡寧忍務嗚呼哀哉
明監吉凶體達存亡深垂典制申之嗣皇聖上虔奉是

順是將乃初玄宇基為首陽擬迹穀林追堯纂唐合山
同陵不樹不疆塗車芻靈珠玉靡藏百神警侍來賓幽
堂耕禽田獸望蒐之翔於是俟大隧之致功兮練元辰
之淑禎潛華體於梓宮兮馮正殿以居靈顧皇嗣之號
咷兮存臨者之悲聲悼晏駕之既修兮感容車之速征
浮飛蒐於輕霄兮就黃墟以滅形背三光之昭晰兮歸
玄宅之冥冥嗟一往之不及兮痛閔闔之長扃咨遠臣
之眇眇兮成凶諱以怛驚心孤絕而靡告兮紛流涕而

交頸思恩榮以橫奔兮閔闕塞之嶢嶢顧衰經以輕舉
兮迫關防之我嬰欲高飛而遙憇兮憚天網之遠經遙
投骨於山足兮報恩養於下庭慨拊心而自悼兮懼施
重而命輕嗟微軀之是效兮甘九死而忘生幾司命之
役籍兮先黃髮而隕零天蓋高而察卑兮冀神明之我
聽獨鬱伊而莫愬兮追顧景而憐形奏斯文以寫思兮
結翰墨以敷誠嗚呼哀哉

三國志文類卷五十七

欽定四庫全書

三國志文類卷五十八

詩賦

魏

王粲美西征詩

魏公西征張魯侍中王
粲作五言詩以美其事

從軍有苦樂但問所從誰
所從神且武安得久勞師
相公征關右赫怒振天威
一舉滅獯虜再舉服羌夷
西收邊地賊忽若俯拾遺
陳寶越山嶽酒肉踰川坻
軍中多

饒飫人馬皆湔肥徒行兼乘還空出有餘資拓土三千里往反速如飛歌舞入鄴城所願獲無違

文帝臨江觀兵詩

文帝行幸廣陵故城臨江觀兵帝於馬上為詩

觀兵臨江水水流何湯湯戈矛成山林玄甲曜日光猛將懷暴怒膽氣正從橫誰云江水廣一葦可以航不戰屈敵虜戢兵稱賢良古公宅岐邑實始翦殷商孟獻營虎牢鄭人懼稽顙充國務耕殖先零自破亡興農淮泗間築室都徐方量宜運權略六軍咸悅康豈如東山詩

悠悠多憂傷

陳思王獻文帝詩 二篇

於穆顯考時惟武皇受命于天寧濟四方朱旗所拂九
土披攘玄化滂流荒服來王超商越周與唐比蹤篤生
我皇弈世再聰武則肅烈文則時雍受禪炎漢臨君萬
邦萬邦既化率由舊則廣命懿親以蕃王國帝曰爾侯
君茲青土奄有海濱方周于魯車服有輝旗章有叙濟
濟雋乂我弼我輔伊予小子恃寵驕盈舉挂時綱動亂

國經作藩作屏先軌是墮傲我皇使犯我朝儀國有典
刑我削我紕將寘于理元凶是率明明天子時篤同類
不忍我刑暴之朝肆違彼執憲哀予小子改封兗邑于
河之濱股肱弗置有君無臣荒淫之闕誰弼予身玆玆
僕夫于彼冀方嗟予小子乃罹斯殃赫赫天子恩不遺
物冠我玄冕要我朱紱朱紱光大使我榮華剖符授王
王爵是加仰齒金璽俯執聖策皇恩過隆祇承怵惕咨
我小子頑凶是嬰逝慙陵墓存愧闕廷匪敢傲德實恩

是恃威靈改加足以沒齒昊天罔極性命不圖常懼顛
沛抱罪黃墟願蒙矢石建旗東嶽庶立毫釐微功自贖
危軀授命知足免戾甘赴江湘奮戈吳越天啟其衷得
會京畿遲奉聖顏如渴如饑心之云慕愴矣其悲天高
聽卑皇肯照微

又曰

肅承明詔應會皇都星陳夙駕秣馬脂車命彼掌徒肅
我征旅朝發鸞臺夕宿蘭渚芒芒原隰祁祁士女經彼

公田樂我稷黍爰有樛木重陰匪息雖有餽糧饑不遑
食望城不過面邑匪游僕夫警策平路是由玄駟藹藹
揚鑣剽沫流風翼衡輕雲承蓋涉澗之濱緣山之隈遵
彼河許黃阪是階西躋闕谷或降或升駢駟倦路再寢
再興將朝聖皇匪敢晏寧弭節長驚指日過征前驅舉
燧後乘抗旌輪不輟運鸞無廢聲爰暨帝室稅此西墉
嘉詔未賜朝覲莫從仰瞻城闕俯惟闕廷長懷永慕憂
心如醒

又發憤告離詩

是時待過諸國法峻任城王暴薨諸王既懷友于之痛植及白

馬王彪還國欲同路東歸叙隔關之思而監國使者不聽植發憤告離而作詩曰

謁帝承明廬逝將歸舊疆清晨發皇邑日夕過首陽伊
洛曠且深欲濟川無梁汎舟越洪濤怨彼東路長回顧
戀城闕引領情內傷大谷何寥廓山樹鬱蒼蒼霖雨泥
我塗流潦浩從橫中遠絕無軌改轍登高岡修阪造雲
日我馬玄以黃玄黃猶能進我思鬱以紆鬱紆將何念
親愛在離居本圖相與偕中更不允俱鴟梟鳴衡軌豺

狼當路衢蒼蠅間白黑詭巧反親疎欲還絕無蹊攀轡
止踟躕踟躕亦何留相思無終極秋風發微涼寒蟬鳴
我側原野何蕭條白日忽西匿孤獸走索羣銜草不遑
食歸鳥赴高林翩翩厲羽翼感物傷我懷撫心長歎息
歎息亦何為天命與我違奈何念同生一往形不歸孤
蒐翔故域靈樞寄京師存者勿復過亡沒身自衰人生
處一世忽若朝露晞年在桑榆間影響不能追自顧非
金石吐咤令心悲心悲動我神棄置莫復陳丈夫志四

海萬里猶比鄰恩愛苟不虧在遠分日親何必同衾裯
然後展殷勤倉卒骨肉情能不懷苦辛苦辛何慮思天
命信可疑虛無求列仙松子久吾欺變故在斯須百年
誰能持離別永無會執手將何時王其愛玉體俱享黃
髮期收涕即長塗援筆從此辭

又琴瑟調歌辭

吁嗟此轉蓬居世何獨然長去本根逝夙夜無休閒東
西經七陌南北越九阡卒遇回風起吹我入雲間自謂

終天路忽焉下沉淵驚飈接我出故歸彼中田當南而
更北謂東而反西宕宕當何依忽亡而復存飄飄周八
澤連翩歷五山流轉無恒處誰知吾苦艱願為中林草
秋隨野火燔糜滅豈不痛願與林葉連

楚王世子嘉遺石崇詩

文武應時用無才在明哲嗟嗟我石生為國之後傑入
侍於皇闈出則登九列威檢肅青徐風發宣吳裔疇昔
謬同位情至過魯衛分離踰十載思遠心增結願子鑒

斯誠寒暑不踰契

石崇答詩

昔常接羽儀俱游青雲中敦道訓胄子儒化渙以融同
聲無異響故使思愛隆豈惟敦初好欸分在令終孔不
陋九夷老氏適西戎逍遙滄海隅可以保王躬世事非
所務周公不足夢玄寂令神王是以守至沖

阮瑀造琴歌

瑀善解音能鼓琴遂撫弦而歌因造歌曲曰奕奕天門

開大魏應期運青蓋巡九州在東西人怨士為知己死
女為悅者玩恩義苟數暢他人焉能亂

阮籍寄懷歌

籍少時嘗遊蘇門山蘇門山有隱者莫知姓名有竹實數斛白杵而

已籍從之與談太古無為之道及論五帝三王之義蘇門生蕭然曾不經聽籍乃對之長嘯清韻響亮蘇門生追爾而笑籍既降蘇門生亦嘯若鸞鳳之音焉至是籍乃假蘇門先生之論以寄所懷其歌曰

日没不周西月出丹淵中陽精蔽不見陰光代為雄
亭在須臾厭厭將復隆富貴俯仰間貧賤何必終又歎

曰天地解兮六合開
星辰隕兮日月頽
我騰而上將何懷

嵇康自責詩

北山中見隱者孫登康欲與之言登默然不對踰時將去康曰先生

竟無言乎登乃曰子才多識寡難乎免於今之世及遭呂安事為詩自責

欲寡其過謗議沸騰性不傷物
頻致怨憎昔慙柳下今愧孫登
內負宿心外赧良朋

吳質思文帝詩

文帝崩質思慕作詩曰

愴愴懷殷憂殷憂不可居
徒倚不能坐出入步踟躕念

蒙聖主恩榮爵與衆殊自謂永終身志氣甫當舒何意
中見棄棄我歸黃壚犢犢靡所恃淚下如連珠隨沒無
所益身死名不書慷慨自佻俛庶幾烈丈夫

杜摯與母丘儉求藥詩

摯與母丘儉鄉里相親
故為詩與儉求仙人藥

一九欲以感切儉
求助也其詩曰

騏驥馬不試婆娑槽檻間壯士志未伸坎軻多辛酸伊
摯為媵臣呂望身操竿夷吾困商販寧戚對牛歎食其
處監門淮陰饑不餐買臣老負薪妻畔呼不還釋之宦

十年位不增故官才非八子倫而與齊其患無知不在
此袁盎未有言彼此篤病久榮衛動不安聞有韓衆樂
信來給一丸

母丘儉答詩

鳳鳥翔京邑哀鳴有所思才為聖世出德音何不怡八
子未遭遇今者值明時胡康出壘畝楊偉無根基飛騰
冲雲天奮迅協光熙駿驥骨法異伯樂觀知之但當養
羽翮鴻舉必有期體無纖微疾安用問良醫聯翩輕栖

集還為燕雀咄韓衆樂雖良或更不能治悠悠千里情
薄言答嘉詩信心感諸中中實不能辭

陳思王植銅爵臺賦

植字子建時鄴銅爵臺新成太祖悉將諸子登臺使

各為賦植援
筆立成賦曰

從明后而嬉遊兮登層臺以娛情見太府之廣開兮觀
聖德之所營建高門之嵯峨兮浮雙闕乎太清立中天
之華觀兮連飛閣乎西城臨漳水之長流兮望園果之
滋榮仰春風之和穆兮聽百鳥之悲鳴天雲垣其既立

兮家願得而獲逞揚仁化於宇內兮盡肅恭於上京惟
桓文之為盛兮豈足方乎聖明休矣美矣惠澤遠揚翼
佐我皇家兮寧彼四方同天地之規量兮齊日月之暉
光永貴尊而無極兮等年壽於東王云云太祖深異之
吳

薛瑩獻孫皓詩

薛綜子瑩孫皓初為左執法遷
選曹尚書及立太子又領少傅

建衡三年皓追歎瑩父綜遺
文且命瑩繼作瑩獻詩曰

惟臣之先昔仕于漢弈世縣縣頗涉臺觀暨臣父綜遭

時之難邠金失御邦家毀亂適茲樂土庶存子遺天啟
其心東南是歸厥初流隸困于蠻垂大皇開基恩德遠
施特蒙招命拯擢泥汙釋放巾褐受職剖符作守合浦
在海之隅遷入京輦遂升機樞枯瘁更榮絕統復紀自
微而顯非願之始亦惟寵過心存足止重值文皇建號
東宮乃作少傅光華益隆明明聖嗣至德謙崇禮遇兼
加惟渥惟豐哀哀先臣念竭其忠洪恩未報委世以終
嗟臣蔑賤惟昆及弟幸生幸育託綜遺體過庭既訓頑

蔽難啟堂構弗克志在耦耕豈悟聖朝仁澤流盈追錄
先臣愍其無成是濟是拔被以殊榮珣忝千里受命南
征旌旗備物金革揚聲及臣斯陋實闇實微既顯前軌
人物之機復傳東宮繼世荷輝才不逮先是忝是違乾
德博好文雅是貴追悼亡臣冀存遺類如何愚盾曾無
髣髴瞻彼舊寵顧此頑虛孰能忍媿臣實與居夙夜反
側克心自論父子兄弟累世蒙恩死惟結草生誓殺身
雖則灰隕無報萬分

胡綜黃龍賦

權稱尊號因瑞改元又作黃龍大牙常在中軍諸軍進退視其所向

命綜作

賦曰

乾坤肇立三才是生狼弧垂象實惟兵精聖人觀法是效是營始作器械爰求厥成黃農創代拓定皇基上順天心下息民災高辛誅共舜征有苗啟有甘師湯有鳴條周之牧野漢之垓下靡不由兵克定厥緒明明大吳實天生德神武是經惟皇之極乃自在昔黃虞是祖越歷五代繼世在下應期受命發迹南土將恢大繇革我

區夏乃律天時制為神軍取象太一五將三門疾則如
電遲則如雲進止有度約而不煩四靈既布黃龍處中
周制日月實曰太常桀然特立六軍所望仙人在上鑒
觀四方神實使之為國休祥軍欲轉向黃龍先移金鼓
不鳴寂然變施闇謨若神可謂秘奇在昔周室赤烏銜
書今也大吳黃龍吐符合契河洛動與道俱天贊人和
僉曰惟休

三國志文類卷五十八

欽定四庫全書

三國志文類卷五十九

雜文

蜀

卻正釋譏

卻正字令先仕魏為中書令史遷郎至令性澹於榮利而尤耽意文章自

在內職與宦人黃皓比屋周旋經三十年皓從微至貴操弄威權正既不為皓所愛亦不

為皓所憎是以官不過六百石而免於憂患依則先儒假文見意號曰釋譏其文繼於崔

駟達旨其辭曰

或有譏余者曰聞之前記夫事與時並名與功偕然則名之與事前哲之急務也是故創制作範匪時不立流稱垂名匪功不記名必須功而乃顯事亦俟時以行止身沒名滅君子所恥是以達人研道探賸索微觀天運之符表考人事之盛衰辯者馳說智者應機謀夫演略武士奮威雲合霧集風激電飛量時揆宜用取世資小屈大申存公忽私雖尺枉而尋直終揚光以發輝也今三方鼎峙九有未乂悠悠四海嬰丁禍敗嗟道義之沈

塞愍生民之顛沛此誠聖賢拯救之秋烈士樹功之會也吾子以高朗之才珪璋之質兼覽博闕留心道術無遠不致無幽不悉挺身取命幹茲奧秘躊躇紫闥喉舌是執九考不移有入無出究古今之真偽計時務之得失雖時獻一策偶進一言釋彼官責慰此素飡固未能輸竭忠款盡瀝胷肝排方入直惠被黎元俾吾徒草鄙並有聞焉也蓋亦綏衡緩轡回軌易塗興安駕肆思馬斯徂審厲揭以投濟要夷庚之赫撫播秋蘭以芳世副

吾徒之彼圖不亦盛與余聞而歎曰嗚呼有若云乎耶
夫人心不同實若其面子雖光麗既美且艷管闔筐舉
守厥所見未可以言八紘之形埒信萬事之精練也或
人率爾仰而揚衡曰是何言與是何言與余應之曰虞
帝以面從為戒孔聖以悅已為尤若子之言良我所思
將為吾子論而釋之昔在鴻荒矇昧肇初三皇應籙五
帝承符爰暨夏商前典攸書姬衰道缺霸者翼扶嬴氏
慘虐吞噬八區於是從橫雲起狙詐如星奇邪蠢動智

故萌生或飾真以讐偽或挾邪以干榮或詭道以要上
或鬻技以自矜背正崇邪棄直就佞忠無定分義無常
經故鞅法窮而慝作斯義敗而姦成呂門大而宗滅韓
辯立而身刑夫何故哉利回其心寵耀其目赫赫龍章
鑠鑠車服踰幸苟得如反如仄滔邪荒迷恣睢自極和
鸞未調而身在轅側庭宇未踐而棟折榱覆天收其精
地縮其澤人弔其躬鬼焚其額初升高岡終隕幽壑朝
含榮潤夕為枯魄是以賢人君子深圖遠慮畏彼咎戾

超然高舉寧曳尾於塗中穢濁世之休譽彼豈輕主慢
民而忽於時務哉蓋易著行止之戒詩有靖恭之歎乃
神之聽之而道使之然也自我大漢應天順民政治之
隆皓若陽春俯憲坤典仰式乾文播皇澤以熙世揚茂
化之醲醇君臣履度各守厥貞上垂詢納之宏下有匡
救之責士無虛華之寵民有一行之迹粲乎疊疊尚此
忠益然而道有隆窳物有興廢有聲有寂有光有翳朱
陽否於素秋玄陰抑於孟春義和逝而望舒係運氣匿

而耀靈陳冲質不永桓靈隆敗英雄雲布豪傑蓋世家
挾殊議人懷異計故從橫者歟披其胷徂詐者暫吐其
舌也今天網已綴德樹西隣丕顯祖之宏規縻好爵於
士人興五教以訓俗豐九德以濟民肅明祀以禘祭幾
皇道以輔真雖跼者未一偽者未分聖人垂戒蓋均無
貧故君臣協美於朝黎庶欣戴於野動若重規靜若疊
矩濟濟倬彥元凱之倫也有過必知顏子之仁也侃侃庶
政冉季之治也鷹揚鷺騰伊望之事也總羣俊之上畧

含薛氏之三計敷張陳之秘策故力征以勤世援華英而不遑豈暇修枯籜於榛穢哉然吾不才在朝累紀託身所天心焉是恃樂滄海之廣深歎嵩嶽之高時聞仲尼之贊商感鄉校之益已彼平仲之和羹亦進可而替否故矇冒瞽說時有攸獻譬道人之有采於市閭游童之吟詠乎疆畔庶以增廣福祥輸力規諫若其合也則以闇協明進應靈符如其違也自我常分退守已愚進退任數不矯不誣循性樂天夫何恨諸此其所以既入

不出有而若無者也狹屈氏之常醒濁漁父之必醉溷
柳季之半辱褊夷叔之高懟合不以得違不以失得不
充訕失不慘悸不樂前以顧軒不就後以慮輕不粥譽
以干澤不辭愆以忌紕何責之釋何殮之卹何方之排
何直之入九考不移固其所執也方今朝士山積髦俊
成羣猶鱗介之潛乎巨海毛羽之集乎鄧林游禽逝不
為之勘浮魴鱖不為之殷且陽靈幽於唐葉陰精應於
商時陽旰請而洪災息桑林禱而甘澤滋行止有道啟

塞有期我師遺訓不怨不尤委命恭已我又何辭辭窮
路單將反初節綜墳典之流芳尋孔氏之遺藝綴微辭
以存道憲先軌而投制韙叔肝之優游美疎氏之遐逝
收止足以言歸汎浩然以容裔欣環堵以恬娛免咎悔
於斯世顧茲心之未泰懼末塗之泥滯仍求激而增憤
肆中懷以告誓昔九方考精於至貴秦牙沈思於殊形
薛燭察寶以飛譽瓠梁託弦以流聲齊隸拊髀以濟文
楚客潛冠以保荆雍門援琴而挾說韓哀秉轡而馳名

盧敖翔翔乎玄闕若士竦身於雲清余實不能齊技於
數子故乃靜然守已而自寧

李興立碣表閭文

晉永興中鎮南將軍劉弘至
隆中觀亮故宅立碣表閭命

太傅掾韋為
李興為文曰

天子命我于沔之陽聽鼓鞀而永思庶先哲之遺光登
隆山以遠望軾諸葛之故鄉蓋神物應機大器無方通
人靡滯大德不常故谷風發而騶虞嘯雲雷升而潛鱗
驟摯解褐於三聘尼得招而褰裳管豹變於受命貢感

激以回莊異徐生之摘實釋卧龍於深藏偉劉氏之傾
蓋嘉吾子之周行夫有知己之主則有竭命之良固所
以三分我九鼎跨帶我邊荒抗衡我北面馳騁我魏疆
者也英哉吾子獨含天靈豈神之祇豈人之精何思之
深何德之清異世通夢恨不同生推子八陣不在孫吳
木牛之奇則非殷模神弩之功一何微妙千井齊甃又
何秘要昔在顛天有名無迹孰若吾子良籌妙畫藏文
既沒以言見稱又未若子言行並徵夷吾反垢樂毅不

終奚比於爾明哲守冲臨終受寄讓過許由負展莅事
民言不流刑中於鄭教美于魯蜀民知恥河渭安堵匪
臯則伊寧彼管晏豈徒聖宣慷慨屢歎昔爾之隱卜惟
此宅仁智所處能無規廓日居月諸時隕其夕誰能不
歿貴有遺格惟子之勲移風來世詠歌餘典懦夫將厲
遐哉邈矣厥規卓矣凡若吾子難可究已疇昔之乖萬
里殊塗今我來思覲爾故墟漢高歸魂於豐沛太公五
世而反周想魍魎以髣髴冀影響之有餘鬼而有靈豈

其識諸

吳

華覈草文

孫皓以數年老勅令草表覈不敢又勅作草文佇立待之數為文曰

咨覈小臣草芥凡庸遭眷值聖受恩特隆越從朽壤蟬
蛻朝中熙光紫闥青璫是憑必挹清露沐浴凱風效無
絲釐負闕山崇滋潤含垢思貸累重穢質被榮局命得
融欲報罔極委之皇穹聖恩雨注哀棄其尤猥命草對
潤被下愚不敢違勅懼速罪誅冒承詔命竊逝形留

三國志文類卷五十九

欽定四庫全書

三國志文類卷六十

傳

魏

張夫人傳

鍾會字士季夫人會母也

夫人張氏字昌蒲太原茲氏人太傅定陵成侯之命婦也世長吏二千石夫人少喪父母克成侯家脩身正行非禮不動為上下所稱述貴妾孫氏攝嫡專家心害其

賢數讒毀無所不至孫氏辯博有智巧言足以飾非文過然竟不能傷也及妊娠愈更疾妬乃置藥食中夫人中食覺而吐之瞑眩者數日或曰何不向公言之答曰嫡庶相害破家危國古今以為鑒誠假如公信我衆誰能明其事彼以心度我謂我必言固將先我事由彼發顧不快邪遂稱疾不見孫氏果謂成侯曰妾欲其得男故飲以得男之藥反謂毒之成侯曰得男藥佳事闔於食中與人非人情也遂訊侍者俱服孫氏由是得罪出

成侯問夫人何能不言夫人言其故成侯大驚益以此
賢之黃初六年生曾思寵愈隆成侯既出孫氏更納正
嫡賈氏

成侯命婦傳

鍾會時遭所生母
喪為其母傳曰

夫人性矜嚴明於教訓曾雖童稚勤見規誨年四歲授
孝經七歲誦論語八歲誦詩十歲誦尚書十一誦易十
二誦春秋左氏傳國語十三誦周禮禮記十四誦成侯
易記十五使入太學問四方奇文異訓謂曾曰學猥則

倦倦則意怠吾懼汝之意怠故以漸訓汝今可以獨學
矣雅好書籍涉歷衆書特好易老子每讀易孔子說鳴
鶴在陰勞謙君子藉用白茅不出戶庭之義每使會反
覆讀之曰易三百餘文仲尼特說此者以謙恭慎密樞
機之發行已至要榮身所由故也順斯術已往足為君
子矣正始八年會為尚書郎夫人執會手而誨之曰汝
弱冠見叙人情不能自足則損在其中矣勉思其戒
是時大將軍曹爽專朝政日縱酒沈醉會兄侍中毓宴

還言其事夫人曰樂則樂矣然難久也居上不驕制節
謹度然後乃無危溢之患今奢僭若此非長守富貴之
道嘉平元年車駕朝高平陵曾為中書郎從行相國宣
文侯始舉兵衆人恐懼而夫人自若中書令劉表侍郎
衛瓘夏侯和等家皆怪問夫人一子在危難之中何能
無憂答曰大將軍奢僭無度吾常疑其不安大傅義不
危國必為大將軍舉耳吾兒在帝側何憂聞且出兵無
他重器其勢必不久戰果如其言一時稱明會歷機密

十餘年頗豫政謀夫人謂曰昔范氏少子為趙簡子設伐邾之計事從民悅可謂功矣然其母以為乘偽作詐末業鄙事必不能久其識本深遠非近人所言吾常樂其為人汝居心正吾知免矣但當脩所志以輔益時化不忝先人耳常言人誰能皆體自然但力行不倦抑亦其次雖接鄙賤必以言信取與之間分畫分明或問此無乃小乎答曰君子之行皆積小以致高大若以小善為無益而弗為此乃小人之事耳希通慕大者吾所

不好會自幼少衣不過青紺親營家事自知恭儉然見得思義臨財必讓會前後賜錢帛數百萬計悉送供公家之用一無所取年五十有九甘露二年二月暴疾薨比葬天子有手詔命大將軍高都侯厚加賙贈喪事無巨細一皆供給議者以為公侯有夫人有世婦有妻有妾所謂外命婦也依春秋成風定姒之義宜崇典禮不得總稱妾名於是稱成侯命婦殯葬之禮有取於古制禮也

王弼傳


弼字輔嗣何劭為其傳曰弼幼而察惠年十餘好老氏
通辯能言父業為尚書郎時裴徽為吏部郎弼未弱冠
往造焉徽一見而異之問弼曰夫無者誠萬物之所資
也然聖人莫肯致言而老子申之無已者何弼曰聖人
體無無又不可以訓故不說也老子是有者也故恒言
無所不足尋亦為傳嘏所知于時何晏為吏部尚書甚
奇弼歎之曰仲尼稱後生可畏若斯人者可與言天人

之際乎正始中黃門侍郎累缺晏既用賈充裴秀朱整
又議用弼時丁謐與晏爭衡致高邑王黎於曹爽用
黎於是以弼補臺郎初除覲爽請間爽為屏左右而弼
與論道移時無所他及爽以此虫之時爽專朝政黨與
共相進用弼通雋不治名高尋黎無幾時病亡爽用王
忱代黎弼遂不得在門下晏為之歎恨弼在臺既淺事
功亦雅非所長益不留意焉淮南人劉陶善論從橫為
當時所推每與弼語常屈弼弼天才卓出當其所得莫

能奪也性和理樂游宴解音律善投壺其論道賦會文辭不如何晏自然有所拔得多晏也頗以所長笑人故時為士君子所疾弼與鍾會善會論議以校練為家然每服弼之高致何晏以為聖人無喜怒哀樂其論甚精鍾會等述之弼與不同以為聖人拔於人者神明也同於人者五情也神明茂故能體中和以通無五情同故不能無哀樂以應物然則聖人之情應物而無累於物者也今以其無累便謂不復應物失之多矣弼注易賴

川人荀融難弼大衍義弼答其意白書以戲之曰夫明
足以尋極幽微而不能去自然之性顏子之量孔父之
所預在然遇之不能無樂喪之不能無哀又常狹斯人
以為未能以情從理者也而今乃知自然之不可革足
下之量雖已定乎胷懷之內然而隔踰旬朔何其相思
之多乎故知尼父之於顏子可以無大過矣弼注老子
為之指略致有理統著道略論注易往往有高麗言太
原王濟好談病老莊常云見弼易注所悟者多然弼為

人淺而不識物情初與王黎荀融善黎奪其黃門郎於是恨黎與融亦不終正始十年曹爽廢以公事免其秋遇厲疾亡時年二十四無子絕嗣弼之卒也晉景王聞之嗟歎者累日其為高識所惜如此



三國志文類卷六十